

六字大陀罗尼咒经

失译

六字大陀罗尼咒经

失译人名今附梁录

如是我闻。一时婆伽婆。住王舍城耆闍崛山中。与大比丘众五百人俱。尔时长老阿难。为旃陀梨女咒术所收尔时长老阿难。白佛言世尊。我今强为他收去。婆伽婆我今强为他收去修伽陀。

尔时婆伽婆告长老阿难言。汝来阿难汝莫惊怖。阿难汝当受持六字大陀罗尼咒。为令四众利益安隐安乐吉祥行故。而说咒曰。

斯(须何反)地(除隶反)梯(吐稽反)昙(徒紺反)安(于轲反)茶(徒嫁反)隶般茶(徒嫁反)隶葛罗驰(除寄反)稽由隶 萨帝 婆帝 耶[賒-示+米]婆帝 底闍婆帝 频头摩帝

阿难是咒。能令宿食不消寻得消化。能除吐下等病。能除风病。热病冷病杂病。能灭一切诸邪咒术。能灭起尸。能灭一切形像厌蛊。阿难若有人知此神咒姓名者。彼则不怖畏王难。不怖畏怨敌难不怖畏贼难。不怖畏火难不怖畏水难。若于城邑聚落及在旷野悉无所畏。亦不为他人伺求其过无过可说。若食毒药毒不能害转为利益。

阿难此六字大陀罗尼咒乃是七三藐三佛陀所说。亦是梵王娑婆主说。释提桓因四大天王所说。亦皆随喜破诸咒术消灭起尸。一切形像厌蛊皆悉破坏断灭。长老阿难闻佛所说欢喜奉行。

六字大陀罗尼咒经